

IMMIGRAZIOA. 'Etorkina: behartsuaren aurpegi berria' pastoral idazkia aurkeztu du Donostiako gotzaintzak

DATUA

Biztanleen %1,5 etorkinak dira Hego Euskal Herrian

Espainiar pasaporterik ez izan arren Hego Euskal Herrian bizitzeko baimena dute 40.000 lagunek, hots, biztanleriaren %1,5ek. Horiei gehitu behar zaizkie paperik gabe bizi diren beste milaka batzuk. Nafarroa da etorkin gehien dituen lurraldea (20.000). Etorkinen ia erdia Europako Batasuneko beste herrialde batzuetakoa da.

Atzerritarren legea «biguntzeko» eskatu du Uriartek

Etorkinei laguntzeko galdegin du Donostiako gotzainak, Euskal Herriak herrialde pobreekiko duen zorra kitatzeko modu gisa

Iker Aranburu | DONOSTIA

Espainiako Atzerritarren legea «biguntzeko» eskatu zuen atzo Joan Maria Uriarte Donostiako gotzainak. Uriarteren arabera, gaur egun indarrean dagoen legea oso gogorra da, batez ere paperik ez duten etorkinentzat. Horiek «egoera tamalgarrian» bizi direla ziurtatu zuen eta deia egin zien kristauei eta gizarte osoari etorkinak abegitasun handiagoz trata ditzaten.

Etorkina: behartsuaren aurpegi berria izeneko pastoral idatzia aurkeztu zuen atzo Donostiako gotzainak. Kristau kontzien-

tziak «beste alde batera begiratzeko» ez diela eta eskaini die aurtengo abenduko pastoralak etorkinei.

Azken urteetan Euskal Herrian bizi diren atzerritarrek asko ugariatu direla eta etorkin hurbilean askoz gehiago etorriko direla ziurtatu zuen Uriartek. «Orain arte erraz onartu ditugu, guk haiek behar ditugu eta beraiek behar gaituzte. Inork nahi ez dituen lanak dira eurentzako: etxeko lanak, eraikuntza, abeltzaintza, adinduei eta ezinduei etxean laguntzea... Eguneroko iraupenagatik eta huskeriazko soldatetara ohituta, askok esplotazio nabarmenak diren lan baldintzak onartzen dituzte. Ez-legezko etorkinak direnak, gizalegerik gabeko enpresari batzuen aurrean duten babes eza ia erabatekoa da», dio pastoralak.

Europako beste lurraldeetan baino etorkin gutxiago gurean

«Sarritan ulertarazi nahi digutenaren aurka, etorkinak ez dira lubizi mehatxugarriak eta eus-tezinak», nabarmendu zuen Uriartek. Izan ere, Hego Euskal Herrian biztanleen %1,5 dira, Espainian %3, Frantzia %6 eta %9, esaterako, Alemanian edo Belgikan. «Ez dira arazo, aukera baizik», gogoratu zuen.

Euskal gizarteak etorkin ez europarrak mesfidantzaz hartzen dituela salatzen duen eta sarritan «arriskutsutzat» jotzen di-



JAVIER ETXEZARRETA / EFE

Patxi Aizpitarte bikario nagusia, Joan Maria Uriarte Donostiako gotzaina eta Begoña Arroyo Gipuzkoako Caritaseko arduraduna.

Paperik gabeko etorkinen egoera arautzeko deia egin du Nafarroako Arartekoak

Alberto Barandiran | IRUÑEA

Paperik gabeko etorkinen egoera laster baino lehen arautu beharko litzateke, erregularizazio bereziaren bidez, esaterako, «arrazoi etiko eta ekonomikoengatik». Hala adierazi zuen atzo Maria Jesus Aranda Nafarroako Arartekoak, Erriberan immigrazioaren inguruan egindako txostenaren aurkezpenean. «Immigranteek gehiago ematen digute gugandik jasotzen dutena baino», aipatu zuen Arandak.

Arartekoak kritikatu zuen Espainiako Immigrazio Estatu idazkariaren azken esanak, eta oso kezagarriak zirela esan. Enrique Fernandez-Mirandak adierazi zuen, Iruñean bertan, paperik gabeko etorkinak kanporatu beharko litzaketela.

«Gobernuak erregularizazio prozesua jarri beharko luke martxan», erantzun zion Nafarroako Arartekoak, «arazoari lehenbailehen irtenbidea emateko».

Erriberako immigrazioaren inguruko txostena izan da Arartekoaren bulegoak kalera-tutako lehena.

Oldeak «ustekabeen» harrapatu ditu administrazioak

Txostenak nabarmentzen du administrazioak «ustekabeen» harrapatu dituela etorkinen oldeak. Esaterako, Nafarroara iritsitako etorkinen bi heren 1999tik hona iritsi dira. Arartekoaren ustetan, administrazioek egindako lana, era berean, ez da nahikoa izan, eta polizia neurriak areagotu egin dira.

Joan den hilean, Nafarroan etorkinekin lan egiten duten erakundeek Espainiako Go-

bernu Ordezkaritzarekin harremanak hautsiko zituztela iragarri zuten, «egoera blokeatuta» zegoelako.

Egun 20.000 etorkin inguru bizi dira Nafarroan, baina Erriberan biztanleriaren %4,5 dira dagoeneko, eta zenbait hiritan –Azkoien, kasurako–, %12 dira etorkinak.

Lan eta bizi baldintza kaskarrak ari dira. Gehienak lan baimenik gabe bizi dira, aldika-lanetan aritzen dira, askotan 12 orduz lan eginez, eta jaiegunik gabe. Era berean, lan saria bertakoen erdia baino txikiagoa izaten da –600 eta 800 pezeta orduko (3,60-4,80 euro)–.

Etxeko lanak egiteko kontratatutako langileen baldintzak «demokrazia aurreko garaietakoak» direla salatzen du, era berean, txostenak. «Gure hazkunde ekonomikoa eta biztanleriaren ongizatea lotuta egongo da, etorkizunean, etorkinak integratzeko gaitasunarekin», esan zuen Arartekoak.

ETORKIZUNA

«Nafarroako hazkunde ekonomikoa lotuta egongo da, etorkizunean, etorkinak integratzeko gaitasunarekin»



JOXE LACALLE

Etorkinak Espainiak Nafarroan duen Ordezkaritzaren aurrean, iragan maiatzan.